

續
文
獻
通
考

續文獻通考卷之二百二十四

皇明進士雲間王圻纂輯

物異考 詩異 至鼠異

詩異

宋寧宗開禧二年鄂州民謠塞上將軍少城南從事多宣
威不可問恢復竟如何後權臣開邊鄂為宣撫使置司
多辟親故幕賓聚城南為酣縱云

金章宗泰和八年有童謠云易水流汴水流百年易過又
休休兩家都好住前後總成留至貞祐中舉國遷汴

衛紹王初即位改元大安四年改曰崇慶既又改曰至寧
有人語曰三年大崇至矣大崇者大虫也俄而有胡沙

虎之變

宣宗貞祐元年衛州有童謠曰團團冬劈半年寒食節沒
人烟明年正月元兵破衛城遂丘墟 興定五年京師
童謠云青山轉轉山青眈誤盡少年人蓋是時人皆爲
兵戰鬪山谷轉轉不休當至老也 初南京未破時市
中有一僧不知所從來持一布囊貯粟日日散與市人
所在兒童百十從之又有一人拾街上破瓦復以石擊
碎之人皆以爲狂不曉其故後乃知其意蓋欲人早散
國家將瓦裂云

元

世祖初宋未下時江南謠言江南若破百馬來過當時莫

喻其意及去亡乃知指丞相伯顏也 至元甲子阿合
馬拜中書平章領制國用使司時樂府中盛唱胡十八
小令知識諦者謂其當擅重權十八年人未之信果於
至元壬午伏誅適符其數越五年辛亥桑哥拜中書平
章立尚書省貪暴殘忍更倍於阿合馬人亦謂桑字折
而爲四十八桑字後改作相字亦作爲四十八竟不知
應之於壽或應之於職然自立省之日至辛卯正月敗
績恰四十八月其神驗如此 張之翰字周卿邯鄲人
嘗除授松江知府自題挑符云雲間太守過三載天下
元貞第二年是歲病卒果符其讖云 張起字起之四
明人有詩名嘗作一聯云別來越樹長爲客看盡吳山

不是家未幾卒殆詩讖云

文宗至順二年司徒香山言陶弘景胡笳曲有負屨飛天
曆終是甲辰君之語合陛下生年紀號實受命之符乞
錄付史館詔翰林集賢諸儒臣議咸謂從山所言恐啓
讖諱之端事遂寢

順帝至正五年淮楚間童謠云富漢莫起樓貧漢莫起屋
但看羊兒年便是吳家國後我太祖定鼎于吳蓋童
謠之應也十年河南北童謠云石人一隻眼挑動黃
河天下反及賈魯治河果於黃陵岡得石人一眼而汝
頽之變起脩縣有皇舅墓元初卽有謠云皇舅墓門
閉運根向北去水滸墓門開運根却回來至正十三年

中原大水退土阜崩墓門顯露自後天下多事
不通卒如其識 十四年春城平江於古城基內得一
碑其文云三十六十八子寅卯年至辰巳合收張翼同
爲利不在常不在楊切須欸欸細思量且卜水莫問米
浮圖倒地莫扶起修古岬重開河軍民拍手笑呵呵日
出屋東頭鯉魚山上遊星從月裡過會在午年頭竟不
曉所言何事或者以爲三十六四九也張翼巳午之交
也張士誠第行九四而同首亂者適十八人也豈其然
與 方國珍台之黃岩人其居山中曰洋嶼嘗有童謠
云洋嶼青出賊精國珍後果叛 十五年京師童謠曰
一陣黃風一陣沙千里萬里無人家回頭雪消不堪看

三眼和尚弄瞎馬 十六年正月常熟州陷松江府印
造官號給散吏兵佩帶以防奸偽號之製作畫爲圓圈
繞圍皆火焰圍之內一府字以府印印府字上圈之外
四角府官花押民間謠云滿城多是火府官四散縣城
裡無一人紅軍府上座不二月城破悉如所言 三月
彰德路天雨毛如線而綠民謠云天雨線民起怨中原
地事必變 七月彰德路李樹結實如黃瓜民謠云李
生黃瓜民皆無家 八月彰德路雨毛民謠云天雨虜
事不濟 紅軍初起時旂上一聯云虎賁三千直抵幽
燕之地龍飛九五重開唐宋之天其後毛貴一賊橫行
山東侵犯畿甸駕幸涼京賊勢猖獗無異唐宋 二十

八年六月彰德路天寧寺塔忽變紅色自頂至踵表裏透徹如燬鉄物出於爐頂上有光焰透發自一更至五更乃止癸卯甲辰亦如之先是河北有童謠云塔而黑北人作主南人客塔而紅朱衣人作主人公

皇明

太祖洪武五年壬子春三月中書右丞王溥受命督採林木至建昌蛇舌巖衆見衣黃衣者歌曰龍蟠虎踞勢堯堯赤帝重興勝六朝八百年來鍾王氣重華從此繼唐堯其聲如鐘已忽不見溥以上聞太祖曰明理者非鬼怪可惑守正者非讖諱可遷漢之文成五利足以爲戒事涉妖妄豈可信也

建文君常有詩云是日乘輿看晚晴葱葱佳氣滿京陵禮樂再興龍虎地衣冠重整鳳凰城人以爲文皇識也

訛言

宋寧宗時浙東訛言唵縣有虎神鼻人捕之

金宣宗貞祐三年六月京城中夜妄相驚逐狼月餘方息元太宗九年左翼部訛言括民女帝怒因括以賜麾下世祖至元十一年誅西京訛言惑衆者

成宗大德六年龍興民訛言括童男女至有殺其子者命捕爲首者三人誅之始息

順帝至元二年民訛言朝廷拘刷童男女一時嫁娶殆盡胡粹中曰人必好色然後疑其淫人必貪財然後疑其

盜訛言雖起於閭閻之小人亦在上者露其機括故以發之耳當時順帝志荒而欲縱聲色之好不待哈麻進秘密而後肆也訛言其必有所自矣

三年民訛言朝廷將采童男女以授韃靼爲奴婢且令父母護送直抵北交割故自中原至於江南凡品官庶人家但有男女年十二三以上便爲婚嫁雖守土官吏與夫韃靼色目之人亦如之十餘日乃止 至正元年江浙行省平章政事只理瓦台入城之任日衣紅衣童謠曰火殃來矣至四月十九日杭州災燬官民房屋公廨寺觀一萬五千七百五十五間燒死七十六人明年四月又災甚於前自昔所未有也

皇明

太祖洪武八年甲寅冬十二月陝州人獻天書辭涉妄誕
斬之

英宗正統元年京師小兒會天旱祈雨口中群誦雨帝雨
帝城隍雨帝隨有土木之變 郕王以弟卽位蓋與弟
之謠至此始驗 十三年有人夢開黃榜傳第一名彭
時國子生其人言於朋輩徧傳都下又一人謂岳正曰
我昨夢見賢兄魁多士正曰若夢可信則已有人夢彭
時作魁矣其人戲曰會試廷試有兩魁二人各占其一
可也已而果然時有童謠云衆人知不知今年狀元
是彭時亦不知何自而起也

世宗嘉靖十四年京師民謠有曰十萬呂文選一億汪尚書蓋指汪鉉呂希周也時給事中孫應奎御史王廷等各列鉉賊以謠爲證章十餘上鉉乃乞休希周已遷通政并罷三十四年十二月浙直訛傳有物如蝴蝶夜入人家變幻飛走禦之被傷如爪痕民間鳴鑼擊鼓爲防或言是馬祖師術官司捕馬道士不得尋亦止息穆宗隆慶二年正月江南訛言京師道內臣選宮女于各省自是民間室女節婦老少苟且婚配旬月殆盡士大夫家亦爲之後來爭訟紛擾彌年乃定

今上萬曆二十六年正月兵部李禎奏本部哨役于部門外通衢拾得亂言書冊言道言佛無似怨忿又散非一

處拾非一人喧聞市井 二月南京守備邢隆奏二十五年十二月二十二日安鄉伯張世恩等進內宿直捉獲男子一名供名宋四八浙江杭州府錢塘縣人有東陽人嚴師傅住離城二十里放光寺帶來經書口稱今人有難觀音彌勒下界將此經書同至南京在皇城內不拘官民看此可免災難引四八將書遺端門外白布包黃紙裹書十七冊上有奏聞二字及指南書三字中間語言荒唐不經煽惑人心

服妖

元世祖至元二十八年九月命尚衣局織無縫衣

射妖

金哀宗天興元年八月有箭射入宮中

毛蟲之異

宋

高宗建炎間荆南張四者虎突至其家急登梁喘伏虎未
之見也升堂脫其皮變爲男子遍歷室中及居側林莽
中尋之張乃下取其皮縛置梁上暮虎還視其皮大咤
曰吾奉天符取十七人止餘汝在善還我皮當捨汝張
乃應之曰還皮易耳汝卽食我柰何曰我雖異類不忍
負信遂出懷中天符索筆勾其名擲皮下虎蒙於體復
故形哮吼奮迅跳出明日聞六十里外夜大雷震死一
虎

遼太宗以唐天復二年生神光異常獵者獲白鹿人以爲瑞 天顯三年二月憶隱涅里衮進白狼 九年正月南京進白麋 會同元年二月室韋進白麋 三年二月獵水門獲白鹿 四年二月皇太子進白獐 六年六月奚田勃德部進白麋

穆宗應曆二年十一月朔州民進白兔 十三年五月幹郎改國所進花鹿生麋 十八年六月撻烈于鵬窠中得牝犬來獻 十九年三月漢遣使進白鹿

興宗重熙二十一年九月平州進白兔

金

太祖未卽位時使斡賽伐高麗爲具於毬場以待捷音有

二廬渡水而至獲之太祖曰此休徵也言未既而捷書至

熙宗皇統三年七月太原路進獬豸

海陵正統六年十月大軍伐宋將至廬州獲白鹿以爲武王白魚之兆

世宗大定四年七月嵐州進白兔二

章宗太和八年八月有虎至陽春門外駕出射獲之元

光元年十月上獵近郊獲白兔群臣以爲瑞明日御便殿置鈴於頂將縱之兔驚躍不已忽斃几上一二年十一月開封有虎害人是時屢有妖怪二年之中白日虎擲門吏部及宮中有狐狼鬼哭於輦路

哀宗天興初荆王守純府第每夜房間群狐號鳴秉燭逐捕則失所在未幾哀宗遷歸德後崔立以城降而守純等皆死青城

元

太祖駐師西印度忽有大獸其高數丈一角如犀牛然能作人語云此非帝世界宜速還左右皆震懼獨耶律楚材進曰此名角端乃旄星之精也聖人在位則此獸奉書而至且能日馳萬八千里靈異如鬼神不可犯也帝卽回馭

天台陶九成曰稽之前志神禹氏治水功成天降飛鬼日行三萬里而未嘗善言也又后土鐵蹄之獸至善言

而未聞其爲獨也軒轅獲飛黃而獨角漢武獲獸併角而五蹄又未曾聞其善言能走也及聖祖誕膺天命而角端出焉夫一角者所以明海宇之一萬八千里之涉者所以示無遠弗届也

世祖至元二十八年虎入南城翰林侍講學士趙與愚上疏言權臣專政之咎

成宗元貞三年海州牟平縣獲白鹿於聖水山以獻

順帝至正十年彰德境內狼狽爲害夜如人形入人家哭就人懷抱中取小兒食之是年浙江鄉試八月二十二日夜院中彷彿見一物馳過甚疾其狀如猛獸者軍卒從而喧哄因出角端爲賦題二十三年福州連江

縣有虎入於縣治 二十四年福州白晝獲虎於城西
績溪縣嘗有群虎入境又有猛獸如彪逐虎食之虎駭
而悉去

皇明

太祖洪武五年八月河南民獻白兔 命放之野 十年
冬十月初三有虎白日入漢西門傷二軍人其一死

詔赦徒役

成祖永樂二年甲申秋九月丁未 周王以騶虞來獻

是年八月 周王畋於鈞州獲一獸白質黑章貌首虎
軀其狀孔威不可迫視 王命部卒俟之其性馴擾因
召詢父老皆謂之騶虞至是 王率其屬表獻 闕下

十一年癸巳五月騶虞見于山東曹縣六月丁未朔以獻白質黑章性仁而馴呂震請表賀上曰汝能効李沆爲人則善矣震退上顧侍臣曰震可謂不學無術者也十六年耀州獻玄兔呂震請賀不許

宣宗宣德四年二月襄城伯李隆獻騶虞二云出滁州來安縣石固山素質黑文馴狎不驚上命群臣觀之胡濙等請上表賀上曰禎祥之興必有實德庶幾副之朕嗣位今四年中外所任豈皆得人民生豈皆得所騶虞之祥於德弗類唐太宗嘗曰堯舜在上百姓敬之如神明愛之如父母動作興事人皆樂之發號施令人皆悅之是大祥瑞朕與卿等宜共謹之若騶虞其免賀

宣宗宣德八年癸丑秋閏八月編脩許彬以麒麟獅子福
鹿玄虎四祥進

孝宗弘治十一年六月京師西直門有熊入城守衛者不
覺馬文升謂野獸不宜入城奏參守衛因乞嚴武備以
防不虞兵部郎中何孟春謂同列曰熊之爲兆既當被
盜亦宜慎火同列莫曉不幾城內在處有火災禮部焚
既而禁中亦火乾清宮焚或問孟春孟春曰予不曉占
書曾記宋人紀紹興己酉永嘉災前數日有熊至城下
州守高世則謂其倖趙允緝曰熊於字能火郡中宜慎
火果延燒官民舍是年之語蓋憶此事而云耳不意亦

驗

世宗嘉靖二十年人家生一犬八足四耳四目識者以爲
大羊入犯之兆後虜入大同掠萬餘人牛羊不計其數
十二年癸巳春總理糧儲兼巡撫應天右副都御史
陳軾以瑞兔獻 詔弗稱賀以禮部尚書夏言奏也

三十七年胡宗憲進白鹿秋八月宗憲又進白鹿 三
十九年秋宗憲又進白鹿壽芝 四十年春正月陝西
商南山萬壽宮前芝叢中土人得白鹿巡撫以獻 是
年春二月南京錦衣指揮徐繼勳獻白鹿 四十三年
甲子五月十六日祝壽生一子十八日又得一瑞菴是
日內畜玉兔生二子閣臣徐階等率百官上表賀 四
十五年丙寅夏六月二十五日太醫以瑞兔獻體備五

色迥異恒品

今上萬曆二十三年春三河縣民家母彘生八小豕內有一人形者手足俱備但頭額上止有一眼產下能行其家以爲不祥斃之占者謂豕生人或人頭豕身爲邊鄙不寧之兆

麒麟

金熙宗天眷五年十月大名府進牛生麟

元

成宗大德九年二月大同平地縣迷兒的斤家牛生麒麟而死

武宗至大四年大同宣寧縣民滅的家牛生一犢其質有

鱗無毛其色青黃類麟以其韓上之

仁宗皇慶元年六月武安樂陽村產麒麟 二年二月是
村麒麟又生始生其母懼而不近三步之外直視之而
鳴麟亦鳴聲不類犢

泰定帝三年湖州府長興州民王復家牛生一獸麟身牛
尾口耳皆赤墮地即大鳴母不乳之具圖以上不知何
獸或曰此瑞也宜令史官紀錄

順帝至正九年三月陳州楊家庄牛生黃犢火光滿室麻
頂綠角間生綠毛不食乳二日而死

皇明

成祖永樂十二年榜葛刺王表獻麒麟 上命免賀

十三年麻林國進麒麟呂震請表賀上曰翰林往日脩五經四書性理大全朕則許之麒麟有無何所損益其已之

馬異

宋寧宗嘉定十三年華容鄧氏馬產龍駒事聞命有司立馬監於此以識其祥後又產于其隣

蔣粹翁政和人宋季爲太學生元混一天下隱於蒲月山嘗言其先世家九峰山下畜一牝馬舍側有龍潭馬入浴其中龍與之媾而生龍駒龍首馬身狀如負河圖者後牧于山林竟失所在

皇明

成祖永樂十八年九月山東青州府諸城縣進龍馬縣
曾有牝于海濱者一日雲霧晦暝有物蜿蜒與馬接至
尾產駒鱗臄肉髮體具龍文其色青蒼孟龍馬云

宣宗宣德七年五月太原忻州民人武煥家馬生一駒鹿
耳牛尾玉面瓊蹄肉文被體如鱗巡撫都御史于謙會
同巡按三司視之咸謂其爲龍馬與而進之禮部尚書
胡濙請借群臣上表賀上曰二三年水旱告災者朕
方日久憂勵一獸之微何救民饑而欲表賀其止之

孝宗弘治元年戊申二月二十六日浙東處州景寧縣北
屏風山有白馬成群首尾相銜從牛首山迤邐騰空而
去聞是年陝西天門開人馬百萬自下而上大都所見

人馬皆鬼物之類甚可怪也

牛異

宋理宗端平元年八月紹慶府黃登進對奏武泰本唐武泰軍節度使今陛下潛藩陞爲紹慶府臣到任後牛生獨角

金熙宗天眷七年十一月兵部尚書完顏秉德進三角牛元世祖至元十六年四月益都樂安縣朱十五家牛生犢犢兩頭四耳三尾其色黃生而卽死

順帝至正十年秋襄陽軍城民家牛生犢五足前二後二十六年春汴梁牛生犢雙首二日卽死

十八年五月東昌聊城縣錢鎮撫家生黃犢六足前二後四二日而死

皇明

世宗嘉靖五年河南南陽縣牛生犢一首兩身 是年禮部尚書席春奏有牛產犢一身二首腹內心肺膽各二 是年南城縣有虎手足如人傷人畜無算 十一年貴州銅城川平山衛軍餘范璽家于二月三十日黃牯牛生犢頭額豐滿牙齒巉巖前二膝至足并尾俱成鱗甲甲內有毛渾身有紋落地而死 四十年福建漳浦縣牛生犢三日三角人以爲牛妖

今上萬曆二十四年正月瀘州張四兒家訟于州稱四兒

業屠牛衛軍馬洋回回種也性亦嗜食牛自鄉牽牛赴
州至大渡口登舟牽繩忽斷牛奔入市過四兒家四兒
恃力直前縛之不能制大懼奔入一店中牛亦追入店
四兒登樓牛亦登樓觸四兒勝出死牛下樓復轉入一
巷中覓一牛肉肆適其主他出盡毀其家器業始徐徐
出郊問之客店樓小梯狹而牛上下無碍其事甚怪

羽化之異

宋永州瀟岩有馴狐凡貴客至則鳴鄒浩將至而狐鳴寺
僧出迎浩怪之僧以狐鳴爲言浩常有詩云走入山來
亦偶然初聞消息與人傳馴狐底事先知得隔夜飛鳴
張老禪 長安文紹蘭適任宗宗爲賈湘中數年不歸

鼎梁燕而語之曰吾聞燕自海東來往必由湖中欲憑
汝附書於夫言訖淚下燕頰頰若有所諾復曰若允當
拍我懷燕遂棲膝上蘭以詩繫足云一自去重湖臨臆
泣血書殷勤憑燕翼寄與薄情夫宗時在荊州忽燕子
拍于肩解足書視之感泣遂歸 應山有字鴈媒者宿
媒沙中諸群鴈聞其聲而至則掩取之三年矣一日中
足鴈哀鳴而下與媒交其項弗釋併死之字者遂不復
弋

遼太宗生時獵者獲白鴈人以爲瑞 天顯九年八月遼
王自將南伐拽刺解里手接飛鴈上異之因以祭天地
十一年八月遼主自將以援石敬瑭有飛鴈自墜而

死南府夷離董曷魯恩得之以獻卜之吉上曰此從珂
自滅之兆也後果有應

穆宗應曆二年十月司徒老古等獻白雉

崇宗統和四年四月親征宋次沙姑河之北旋以近侍粘
木里所進自落鴟祭天地 十一月伐宋捷還次白佛
塔獲自落馴狐以爲吉徵祭天地 九年八月東京進
三足鳥

興宗重熙中劉伸爲崇義軍節度使政務簡靜民用不擾
致烏鵲同巢之應詔褒遷其官

金太宗天會四年八月新城縣進白鳥

熙宗天眷十五年七月有司進四足雀

世宗大定二十九年十二月密州進白鴉白雉各一

宣宗元光二年正月有鶴千餘翔于殿庭移刻去是時烏鵲夜驚飛鳴蔽天其諸妖怪甚多十二月帝崩

元世祖至元五年秋七月螟生牧野南尋有鸛鶴自西北踰山來方六七里間林木皆滿遂下啄蝗食且盡乃作陣飛去

成宗大德三年七月揚州淮安蝗在地者爲鷲啄食飛者以翅擊死乃禁捕鷲

順帝至正十一年五月興國有大鳥千餘飛至郡西白郎山巔狀如人立去而復至者數次十九年京師鴟鵂夜鳴達旦連月乃止有杜鵑啼於城中居庸關亦如之

續文獻通考卷之百一十五
二十七年三月丁丑朔萊州招遠縣大社里黑風大
起有大鳥自南飛至其色蒼白展翅如席狀類鶴俄頃
飛去遺下粟黍稻麥黃黑豆蕎麥于張家屋上約數升
許是年大稔

皇明

太祖洪武十一年戊午元旦早朝有鴟鴞自天而墮死于
丹墀見者異之

孝宗弘治十四年二月保定府臣獻白鴉以爲祥瑞禮部
尚書傅濟劾其不當奏 詔斥遣之

世宗嘉靖四十一年湖廣巡撫都御史徐南金獻白鴉

鳳凰

遼天祚帝乾統四年十月鳳凰見於鄆陰

金章宗泰和二年八月磁州武安縣鼓山石聖臺有大鳥
十集於臺上其羽五色爛然紋多赤黃赭冠雞項尾潤
而修狀若鯉尾而長高可逾人九子差小侍旁亦高四
五尺禽鳥萬數形色各異或飛或蹲或步或立皆成行
列首皆正向如朝拱然初自東南來勢如連雲聳似啓
雷林木震動牧者驚惶卽驅牛擊物以驚之殊不爲動
俄有大鳥如鴈鷗者怒來搏擊之民益恐奔告縣官以
爲鳳凰也命工圖上之留二日西北去按視其處糞迹
數頃其色各異遺禽數千累日不能去所食皆巨鯉大
者丈餘魚骨蔽地以其事告宗廟詔中外

元順帝至正十一年廣西慶遠府有異禽雙飛見於述昆鄉飛鳥千百隨之蓋鳳凰云其一飛去其一留止爲獵人射死首長尺許毛羽五色有翬之以獻于帥府者久之其色鮮明如生云

雞異

宋度宗咸淳五年雞翼生距

元順帝至正十七年春三月上海李勝一家雞伏七雛一雛作牡雞狀鼓翼長鳴明年戊戌春正月錢塘盧子明家一雞伏九雛一雛有四足二足在翼下不數日皆死而各家亦無他異 至正二十二年龍泉縣人家一雞二形一邊毛羽純雉一邊毛羽純雌能雄鳴又能雌伏

二十五年瑞安縣鄭鎮撫家有雄雞生子殺之腹中
有子昂然

皇明

孝宗弘治十四年春湖廣華容縣紅柿村民刻福家雞生
雛三足

世宗嘉靖四年長垣縣民王憲家雞抱卵內成人形耳目
口鼻四肢皆具

鳴異

今上萬曆甲申年廣濟龍江鎮民其家群鳴中一鳴獨呼
云筭帳始一婢聞之既而群聽無不聞者以告於其家
翁翁聽亦然遂怒殺之置釜中愈烹愈大如鷲皆不敢

食投之江中已而無故構異訟家貨盡破蓋其先世皆
業屠而翁又橫暴好漁奪人貲所謂筭帳必有陰王者
龍蛇之異

宋陶弼永州人游吳中舟行忽雙鯉戲溪上傍一老父曰
此龍也行且鬪若亟去去百步許雷大震岸圮木拔二
十餘舟皆覆弼舟獨完

端宗崩眾共立衛王年八歲方登壇禮畢御輦所向有龍
擎空而上

遼太祖神冊五年五月有龍戰于洩刺山陽水上上射獲
之藏其骨於府內 天顯元年七月次扶餘府城上見
黃龍纏繞長可一里光耀奪目入于行宮有紫黑氣蔽

天逾日帝崩太宗改扶餘府爲黃龍府

聖宗時蕭蒲奴幼孤貧傭於醫家牧牛傷人稼數遭笞辱醫者嘗見蒲奴熟寢有蛇遶身異之教以讀書聰敏好學不數年涉獵經史習騎射仕終奚部六大王蓋龍種也

興宗時蕭柳從伐高麗遇大蛇當路前驅者請避柳曰壯士安懼此拔劍斷蛇而進卒破敵

天祚帝爲金所逼渡河奔夏帥耶律敵烈等劫雅里北走至沙嶺見蛇橫道而過識者以爲不祥後雅里雖立爲帝不久亦死

金熙宗天眷元年夏見一蒼龍一爪承一嬰兒兒爲龍所

戲畧無懼色三日如故 皇統九年四月有龍闔于利

州榆林河上大風壞民居官舍

詳見風門

世宗未卽位時在遼陽一日方寢有紅光照室及黃龍見於寢上後復有雲氣自西來黃龍見其中卽于是年登位 大定十四年八月次紉里赤日中白龍見于御帳之東小港中旣而乘雲上升尾猶曳地良久北去

章宗明昌五年七月有龍曳尾於殿前 六年八月大雨雷電有龍起於渾儀齋跌臺忽中裂而摧儀仆於臺下 宣宗貞祐二年正月次宜春有黃龍見於西北

元世祖至元二十年六月中大雨汲郡河西鄉農有王氏家甫夕黑霧四塞窓戶間寒凜不可勝視之有蒼龍蛇

艇在氣中起而復墮者再時王女下堂驚仆於地救之
乃甦問所見亦同少頃霆震霧散失所在明日視其地
鱗鬣印泥尚宛然

順帝至元五年六月長汀縣山蛟出大雨驟至平地湧水
深三丈餘飄沒民居八百餘家壞田二百餘頃 至正
十五年七月構李城東馬橋上白龍掛烈風怪雨天闇
黑如深夜壞民居百餘所大木盡拔水自半空墮下悉
折爲二雜以萬瓦亂飛溪水直立人皆叫號奔走不暇
顧妻子龍由馬橋歷城北望太湖而去有聲如萬屋齊
壓四望黑雲洶湧失府城所在經一二時方開舞不一
年爲戰鬪之地凡龍所過處荆棘寒煙視昔日之繁華

頰如一夢 十七年六月温州有龍闖於樂清江中颶
風大作所至有光如毬死者萬餘人 八月祥符縣西
北有青白二龍見若相鬪之勢良久而散 二十三年
正月廣西貴州江中有物登岸蛇首四足而青色長四
尺許軍民聚觀而殺之 二十四年六月保德州有黃
龍見於咸寧井中 二十七年六月皇太子寢殿新甃
井成有龍自井而出光焰燦人宮人震懾仆於地又宮
牆外長慶寺所葺成宗幹耳朵內大槐樹有龍纏擾其
上良久飛去樹皮皆剝 七月益都臨朐縣有龍見於
龍山巨石重千斤者浮空而起 二十八年十月大同
路懷仁縣河岸崩有蛇大小相縉結可載數車

皇明

憲宗成化初唐縣於水村人自京至完縣玉山店見二猪
戲溝中頃之入大石下隨率少年持挺移石視之時天
大旱烟雲四起雷雨交作識者知其爲龍也自是每旱
移石輒雨垂四十年後移之不驗或以爲龍移他處耳
五年六月初九日河决杏花營水及堤有龍卵見先
是河水溢三司官具牲醴于河神俄而漁者於河濱拾
一卵以獻衆觀之甚異以手撼之中汨汨作水聲其形
大如人首下銳上員質青白微具五色又多點黑點持
之甚重氣煖而澤潤人不知其爲何祥有占者云江湖
見龍卵王大水吳郡劉昌謂龍有胎未聞卵生或曰蛇

亦卵生茲固其類歟 十四年間吳越大水淫雨不絕
各處多出蛟出時其山中先有大火燒地及左右草木
皆披靡成一徑既入水成驪形但不見足浮游江中而
去 湖州郡丞藍備鄧州人常道其令蜀邑時適郊有
蛇當道驅之不去公曰必鳴寃也令人隨其所之至一
野塘止卽令斲去其水得隻磨有伏屍而不知誰氏備
令徧求村中磨合者果得焉蓋有商客其家相其橐重
因殺之沉屍野塘而覆以磨讞得實罪死復移文招其
子至以橐歸焉

魚異

宋彬州支邑村民圃地昔之達官故宅基其畔有蛇

澄常見雙鯽比翼而嬉經數歲無他鱗民投網取之不可得後澤竭于泥內獲一銅盆中鑄兩魚形與向見者不異注水魚撥刺如前

龜異

遼太宗會同三年四月南塘進白龜

皇明

世宗嘉靖四十一年御院龜生卵者五

豕異

元順帝至正三年秋建寧浦縣民家豕生豚二尾八足十二年江陰永寧鄉陸氏家一猪產十四兒內一豚人之首面手足而猪身十五年鎮江民家豕生豚如象

形 二十四年保德州民家豕生豚一首二身八蹄二尾 又海鹽趙氏營室以居宰猪落成小腸皆已脩治忽併如蛇蜿蜒而走將及里許而止

犬異

宋寧遠縣民畜一犬一日跣足坐垂堂犬忽齧其履置諸門主訝而逐之復齧而前再逐復前既里許乃止及回顧則家已陷矣 咸溪童鏞家畜二犬一白一花共出一母性狡獪善知人意後白者雙盲弗能進牢而食主家作窩卧於簷外花者日啣飯吐而飼之夜則卧于其旁白者既死主憐之埋于門前山麓間花者朝夕往埋所達數匝若拜泣狀卧其旁少頃始返

元成宗元貞丙申秋大都南城武仲祥家有乳犬懷胎左脇下忽腫成瘡六七日後于瘡内生五子色皆青蒼每當春梁自頂至尾生逆毛一道他無所異又數日瘡亦平復

順帝至正二十二年八月上海縣金壽一家已闔雄狗生小狗八其一嘴爪紅如鮮血然牡物而生兒陽化陰也又犬屬火一嘴爪紅亦火也豈非主兵火者與

蟲異

宋永州通判廳軍員毛景得奇疾每語喉中輒有蟲作聲相應有道人令學誦本草藥名至藍而默然遂取藍振汁飲之少頃嘔出肉塊長二寸餘人形悉具

遼太宗會同四年七月有司奏神農車有蜂窠成蜜詔卜
之吉

金太宗天會三年七月錦州野蠶成繭以絲綿來獻詔賞
其長吏

章宗明昌四年六月邢洛深冀及河北西路十六謀克之
地野蠶成繭 承安元年六月平晉縣民利通家蠶自
成錦段長七尺一寸五分濶四尺九寸詔賜絹十疋

元世祖至元中許州麥熟時有青蟲如蠶食麥人無可柰
何忽生大華蟲盡嚼之 四年六月中都順天東平等
處蠶皆火 七年東平大名等路桑蠶皆災 十一年
諸路蚘蚋等蟲災凡九所 十七年二月真定七郡桑

有蟲食之 二十二年真定廣平河間恩州大名濟南
蠶災 二十三年五月廣平等路蠶災 十月興化路
油遊縣虫傷禾 二十九年滄州維州中山元氏無棣
等縣桑蟲食葉蠶不成

成宗元貞元年真定中山靈壽二縣桑有蟲食之 五月
隨州野蠶成繭數百里民取爲繒 大德五年四月彰
德廣平真定順德大名等郡蟲食桑 七年五月濟寧
等處蟲食桑 時仁宗在潛邸日奉答吉太后駐輦懷
孟時苦群蛙亂鳴終日不寐翌旦太后命近侍傳旨諭
之曰吾母子方憤憤蛙忽惱人耶自後其母再鳴故今
此地雖有蛙而不作聲

武宗至大元年五月大名廣平真定三郡蟲食桑

泰定帝至和元年六月河南德安屯蠖食桑

文宗大曆二年春二月真定平山縣蟲食桑盡其葉而蟲俱死 三月滄州高州及南皮塩山武城等縣桑蟲食

之如枯株魏縣有蟲食桑且盡蟲俱死 至順二年三

月真定路蟲食桑爲災冠州蟲食桑四萬株晉冀深蠶等州及鄆城延津二縣蟲夜食桑晝匿土中人莫捕之

五月曹州禹城保定博野東昌封丘等縣蟲食桑皆盡 三年大名諸路有蟲食桑葉且盡

順帝至正初盧文壁尹荆山忽有一巨蛙登廳前兩目睜視類有所訴者令卒尾之行去縣六七里有廢井遂跳

入不出既得報往集里社汲井獲屍乃日前二人同出
爲商一人謀其財而殺之擒捕究問抵罪死者之家云
其在生不食蛙見則買放 三年六月梧州青蟲食稼
十年七月同州蟲食稼郡守石亨祖禱於玄妙觀寒
雨三日蟲盡死

蝗

宋寧宗嘉定元年徽郡飛蝗大起田野驚憂 七年六月
浙東西郡縣蝗 八年兩浙江東西路旱蝗 四月飛
蝗入畿縣自夏至秋蝗患不息諸道捕者以千萬石計
民爭捕官以果易

理宗紹定三年福建蝗

遼聖宗統和三年九月東京平州旱蝗 咸雍三年南京旱蝗 九年七月南京奏歸義涑水縣蝗飛入宋境餘為蜂所食

道宗太原七年五月有司奏永清武清固安三縣蝗 大安四年八月有司奏宛平永清蝗為飛鳥所食 壽隆四年七月南京蝗時蕭文知易州屬縣議捕除之文曰蝗乃天災捕之何益但反躬自責于是蝗盡飛去遺者亦不食苗散在草莽間為鳥鵲所食

金熙宗皇統二年七月廣寧府蝗

海陵正隆三年六月蝗入京師 秋中都山東河東蝗

太宗天會二年曷懶移鹿古水霖雨害稼且為蝗所食

世宗大定三年二月中都以南八路蝗 四年八月中都
南八路蝗飛入京畿時完顏宗寧爲歸德軍節度使督
民捕蝗得死蝗一斗給粟一斗數日捕絕 十六年五
月中都河北山東陝西河東遼東等十路旱蝗 二十
二年五月慶都蝗蝻生散漫十餘里一夕大風蝗皆不
見

章宗太和八年四月河南蝗遣使分路捕之 六月飛蝗
入京畿 七月詔頒捕蝗圖于中外

宣宗貞祐三年五月河南大蝗 四年五月陝西大蝗

七月飛蝗過京師 興定元年三月宮中有蝗 二年

四月河南諸郡蝗

哀宗正大三年四月旱蝗

元

世祖中統三年五月真定順天邢州蝗 八月濱棣州蝗

四年六月燕京河間益都真定東平蝗 至元元年

七月益都大蝗 十二月西京北京順德徐宿邳等州

郡蝗 二年東平濟南益都平濠洛磁順天中都河間

北京祿豐縣真定路蝗 四年山東河南北諸路蝗

五年六月東平等郡及真定蝗 六年六月河南河北

山東諸郡蝗 七年三月益都登萊蝗 七月南京河

南山東諸路蝗 八年六月上都中都大名河間益州

順天懷孟彰德濟南真定衛輝平陽歸德順德等路溜

萊洛磁等州蝗 十五年七月濮州蝗 十六年四月

大都十六路蝗 六月左右衛屯田蝗蝻生 十七年

五月沂州及漣海邳宿等州蝗 十八年順德九縣蝗

十九年四月別十八里部東三百餘里蝗害麥 夏

東平東阿陽穀等處大蝗 二十一年中衛屯田蝗

二十二年大都汴梁益都廬州河間濟寧歸德保定京

師大蝗害稼 二十五年七月真定汴梁蝗 八月趙

晉冀三州蝗 二十七年四月河北十七郡蝗 二十

九年六月東昌濟南般陽歸德等郡蝗 三十年九月

登州蝗 三十一年六月東安州蝗

按釋者謂蝗蟲有甲飛揚之類陽氣所生也恒暘則有

介蟲之孽於春夏爲螽今謂之蝗按劉歆云倉粟取民則螽與魚同占

成宗元貞元年六月汴梁陳留太康考城等縣睢許等州蝗 二年六月濟寧任城魚臺縣東平須城汶上縣開州長垣清豐縣德州濟河縣滑州太和州內黃縣蝗

八月平陽大名歸德真定等郡蝗 大德元年六月歸

德順德邳州徐州蝗 二年四月江南山東兩淮江浙

燕南屬縣百五十處蝗 三年五月淮安屬縣蝗有鴛

食之 十月隴陝蝗 五年六月順德路淇州蝗 七

月廣平真定等路蝗 八月河南淮南睢陳唐和等州

新野汝陽江都興化等縣蝗 六年四月真定大名河

間等路蝗 七月大都涿順固安三州及濠州鐘離鎮
江舟徒等縣蝗 七年五月益都濟南等路蝗 六月
大都路蝗 八年四月益都臨朐德州齊河蝗 九年
四月真定蝗 六月通泰靖海武清等州縣蝗 八月
涿州良鄉河間南皮泗州天長等縣及東安海鹽等州
蝗 十年四月大都真定河間保定河南郡蝗 六月
龍興南康等郡蝗

武宗至大元年澶濮曹高唐等州蝗 五月晉寧路蝗

六月保定真定二郡蝗 八月淮東蝗 二年四月益

都東平東昌順德廣平大名汴梁衛輝等郡蝗 六月

檀霸曹濮高唐太安等州良鄉野城歷陽合肥大寧江

寧句容溧水上元等縣蝗 七月濟南濟寧般陽河中
解絳耀同華等州蝗 八月真定保定河間懷孟等郡
蝗 三年四月鹽山寧津堂邑在平陽殺高唐禹城七
縣蝗 七月磁州威州饒陽元氏平棘滏陽元城無棣
等縣蝗

仁宗皇慶元年彰德安陽縣蝗 延祐七年六月益都路
蝗

英宗至治元年五月霸州蝗 七月江都泰興古城通許
臨淮盱眙清池等縣蝗 十二月寧海州蝗 二年汴
梁祥符縣蝗有群鷺食之既而復吐積如丘堙冬十二
月濟寧蝗 三年五月保定路歸信縣蝗 五年大名

蝗

恭定帝元年永興蝗 六月大都順德東昌衛輝保定益

都濟寧彰德真定般陽廣平大名河間東平等郡蝗

二年汴梁十五縣蝗 五月彰德路蝗 六月德漢曹

景等州歷城章丘淄州柳城荏城等縣蝗 九月濟南

歸德等郡蝗 三年六月東平須城縣興國永興縣蝗

七月大名順德廣平等路趙州曲陽蒲城慶都修武

等縣淮安高郵二郡睢泗雄霸等州蝗 八月永平汴

梁懷孟等郡蝗 四年五月洛陽縣有蝗五畝群鳥盡

食之越數日又集鳥又食之 六月畿內江南蝗 七

月籍田蝗 八月冠州蝗 十二月保定濟南衛輝濟

寧廬州五路南陽河南二府博野臨淄膠西縣蝗 致

和元年四月大都薊州永平路石城縣鳳翔岐山縣蝗

無麥苗 五月潁州及汲縣蝗 六月武功縣蝗

文宗天曆二年大名路諸州縣開滑諸州蝗 四月河南

大寧興中州懷慶孟州廬州無爲州蝗 六月益都莒

密二州蝗 七月真定汴梁永平淮安廬州大寧遼陽

等郡屬邑蝗 三年五月廣平大名般陽濟寧東平汴

梁南陽河南等郡德濮開高唐等州蝗 至順元年六

月真定朔劉固安博興等州蝗 七月解州華州及河

內靈寶延津等二十二縣蝗 又永城蝗 二年三月

陝州諸縣蝗 六月孟州濟源縣蝗 七月河內閿郭

陝縣奉元蒲城白水等縣蝗

順帝元統二年六月遼西蝗 至元二年七月黃州蝗

三年六月懷孟隰州汴梁陽武縣蝗 五年七月膠州

卽墨縣蝗 至正四年歸德府永城縣及亳州蝗 十

二年六月大名蝗 十七年東昌往平縣蝗 十八年

夏薊州遼州濰州昌邑縣膠州高密縣蝗 秋大都廣

平順德及濰州之北海莒州之蒙陰汴梁之陳留歸德

之永城皆蝗順德九縣民食蝗廣平人相食 十九年

大都霸州通州真定彰德懷慶東昌衛輝河間之臨邑

興州大同寧冀二郡文水榆次壽陽徐溝四縣沂汾二

州孝義平遙介休三縣晉寧二州及壺關潞城襄垣三

縣霍州趙城靈石二縣隰州之永和沁之武鄉遼之榆
杜奉元及汴梁之祥符原武鄆陵扶溝杞尉氏洧川七
縣鄭之滎陽汜水許之長葛鄆城襄城臨潁鈞之新鄭
密縣皆蝗食禾稼草木且盡馬不能行坑塹皆盈饑民
捕蝗以爲食或曝乾而積之又盡則人相食五月大蝗

七月淮安清河縣飛蝗蔽天自西北來凡經七日禾
稼俱盡 二十年益都臨朐壽光三縣鳳翔岐山縣蝗

二十一年六月河南鞏縣蝗食稼俱盡 七月衛輝

及汴梁滎澤縣鄭州蝗 二十二年秋衛輝及汴梁開

封扶溝洧川三縣許州及鈞之新鄭密二縣蝗 二十

五年鳳翔岐山縣蝗 續漢縣有蝗自西北蔽空而至

螟

蝻 蚱 蝗 蠧

宋寧宗嘉定十四年金華衢州寧波台州温州有蝻賊

十六年秋永州道州蝻

金章宗明昌三年秋綏德軒蚘蝻生

宣宗貞元四年五月鳳翔扶風岐山郿縣蝻虫傷麥

元世祖至元八年六月遼州和順縣解州聞喜縣蚘蚘生

十八年高唐夏津武城縣蝻害稼 二十三年五月

霸州涿州蝻 二十四年鞏昌蚘蚘爲災 二十七年

四月發州蝻害稼雷雨大作蝻盡死是年大有

按漢志云溫而風則生螟蝻有螟蝻之孽

成宗元貞元年六月利州龍山縣益州明山縣蝻 大德

九年七月桂陽郡蝥

武宗至大元年五月東平東昌益都等郡蝥

仁宗皇慶二年五月檀州及獲鹿縣蝥 延祐二年處州

螟 七年七月霸州及堂邑縣蝥

泰定帝二年處州螟 四年七月奉元路咸陽興平武功

三縣鳳翔府岐山等縣好舛害稼

文宗天曆二年淮安廬州安豐三路屬邑螟

順帝至正十年處州螟 十六年處州螟 十九年濟南

章丘鄒平三縣蝥五穀不登 二十二年春衛輝路螟

六月膠水縣好舛生 七月掖縣好舛生害稼 二

十三年六月寧海文登縣好舛生 七月萊州招遠萊

陽二縣及登州寧海州好蚘生

皇明

英宗正統元年丙辰夏四月河北旱蝗 八年五月畿內

旱蝗

憲宗成化三年七月巡撫王恕奏開封彰德衛輝地方蝗

蝻傷稼 九月河間府蝗

世宗嘉靖八年陝西僉事齊之鸞言河南光息蔡頴諸處
及陝西陝關潼關蝗食禾穗殆盡 上下其章于部

鼠妖

元世祖至元二十二年六月馬湖田鼠食稼殆盡總管祠
而祝之鼠悉赴水死

順帝至正十五年湖廣群鼠數十萬越洞庭湖望四川而去二十年八月慶遠延安寧安等州野鼠食稼初由鵝卵化生既成牝牡生育日滋百畝之田一夕俱盡二十六年泗州潁淮兩岸有灰色黑鼠暮夜出穴成群覆地食禾

皇明

武宗正德初黃州師巫竇均在飛喪崖見一鼠盤旋道上忽入地穴其下得一鈕銅印上篆扶蠶王印用署符呪能呼風雷後損柄不驗

世宗嘉靖中臨江李鏊投徒湖口所居卑隘而旁有樓崇敞然封鑰甚固請居之主人曰中有怪物常斃人死鏊

曰邪不勝正安有是理曰然后其中一日外出留一冠者攝課讀夜分忽一神至貌甚猙獰戴金幘頭絳袍象簡髯垂至腹冠者懼不敢仰視次日盥歸言狀盥曰貴神福人此貧士之資何懼後果再至袍笏端凝如前顧盥作怒盥趨而進自陳且有祈請神不對但吹盥左耳耳卽聾盥怒知不免舉向所備防身大槌盡力一擊中胸有聲啣然逋去遲明報主來索怪踪跡至北廳垣曲有大穴一鼠如斗作赤色髯長尺餘稱之重七觔胸有凝血以中其要害故僅能入穴死王元禎記